

范伯子詩集

范伯子詩集五

通州范當世

光緒十四年戊子十月就婚安福至十五年己丑六月還家作

屏風山下作

倦過名山不用探
看山無句分應慚
平江水落歸何處
廣漠風來冷不堪
竹屋浮沙成小市
漁舟壓雪擁深潭
湖山與我同蕭瑟
豈有潛龍睡得酣

南康城下作

雪裏乘舟出江渚
維舟忽被南風阻
日日登高望北風
北風夜至狂無主
似挾全湖撲我舟
更吹山石當空舞
微命區區在布衾
浮漂覆壓皆由汝
連宵達晝無人聲
臥中已失南康城
眯眼驚窺斷纜處
惟

卷之二
餘廢塔猶崢嶸老僕顛躓強爲飯慰我風微得遠行嗟爾何曾當大
險一風十日天無情吾有光明十捆燭甕有殘醪鉢有肉新硯能容
一斗墨覓毫釐紙堆盈簾爲吾徧塞窗中明早晚澄清煮麤粥吾欲
偷閒疾著書誰能更待山中屋

守風至六七日之久夜不復成寐百慮交至起眺書懷

宵來覺夢更相因數數肝腸變苦辛旅病江湖拋弱弟歲寒門戶累
衰親朝昏兀兀成何事生死茫茫只負人欲把愁心散空關開門稠
疊雪花新

南昌城下作

巖巖百城宰女憧而婦控黑頭擁驢寄十考未成翁湖去老漁悲湖
至多牛窮窮悲亦弗爾山水今疲憊冤哉百城底何自著姚崇

雜感二十八首廬陵道中作時點臨川詩至第八卷卽用其每

詩之題句以窮吾興端

兩馬齒俱壯一馬心先摧一馬興猶怒却向風塵來悠悠各羣逝兩
馬毋相猜吾見九州道道上飛黃埃戰戰道中馬揚鞭坐與僮抑抑
道旁馬牧豎羣相咲心摧固當爾怒亦胡爲哉

春從沙磧底汜濫神州中一風萬竅足一雨千林紅陂隴纖紈綺雀
鳥爲笙鏞吾觀上下際託物無纖洪乘時借春力一一收奇功人爲
萬物主名大實不崇牢爲自生活不與造化通冥情對生理揜耳過
春風誰能撫其體琢冶施天工古來聖人智智必師凡蟲聞譽遍天
下吾方自責躬

晨興望南山山陰雪猶縞道左逢砂山黃黃無寸草晚泊羣山間蒼

然氣廻抱茲皆非吾山何必問醜好吾山天南東左海所淵浩一去
新綠軒悠悠十年老

結屋山澗曲山僧與我親優游弄文史願我歸來頻多財實累汝惱
煞當時人懷哉善自保使我有歸身

朝日一暴背百體從之馴還於屋底坐手足仍凍皴茫茫千里道積
雪埋枯燐船風四而至嗣火嗟無薪發書檢敗簾拂拭燕中塵一讀
凝寒解方知此物仁

黃菊有至性天桃有至情綿綿各自活藹藹爲天榮野人實枯槁菊
以歸泉明焉知五柳下夢與桃花縈一讀閒情賦哀來不可平

少狂喜文章兒戲藏諸笥開閉日數十惟有婦知耳焉知後婦來壯
大仍如此既無經國意亦乏牛毛理論古多弗讐規時又不綺那弗

偷欲休而積寸有咫懷之勿笑人沾之婦亦恥

三戰敗不羞九敗益以笑久於其事中表裏洞如照又知博戲理洞
見得失歟羣人之所爭機數從而妙得者常得之失者驟難剽操持
予奪人喜惡在一眇當時各有絲彼亦孰肯縶終於授受間大小必
同調凡吾所以窮機凝內弗肖

少年見青春窮力追侈驩中年見青春獨爲故人歎誰念故驩易誰
畏新驩難新驩若大道駿馬被雕鞍操之慎無躓萬里亦能殫故驩
似蠻嶺曲折千回盤異時所經歷往往摧心肝嗚呼諒今昔孰知余
所安

白日不照物明月空爾爲茫茫野草綠却受月華滋而况衡門下幽
人方解頤陰霾奪皓魄長夜何由熙冥陵萬燈火慘用枯燐爲乘天

以爲樂昔者余所悲昏昏余不顧羣淵遂從之

筆端無華滋吾能聽其槁微命向吾飄晨饑夕而歸吾有白石池春
秋畜文藻欣於一盼間此疾亦難療世有誰何歟視我一如草

一日不再飯吾知未必能一生不貳辭昔者余所承翻翻日月轉事
有藥千層凝之或爲石徹之或爲冰冰消質猶在石毀不復凝檢點
平生語能無作後懲

秋枝如殘人分當應候捐人衰未卽死作德何限焉老友二三子當
時豈不賢澹然解世務奮爾爲鑽研文之得失具應須過百篇十篇
以往者稱譽固其然惜哉譽而止負此心拳拳

青青西門桃鬱鬱東門柳掩眼不忍過哀哉孰吾友吾意何足宣吾
行多慙負鄉閭美少年西笑背居牖一聽傳臚聲終身謂天右焉知

馬君死隔日露其肘焉知張常塗死去無人守肝懷弗可言改行將
毋醜惟當抱詩書窮觀養餘壽

天下不用車我能泛江海天下不用舟我能上崔嵬舟車列我前我
適將安在悠悠萬事理快足轉而殆明者非能逃澄心百可待捐金
三十萬吾較李生倍守錢吾不能吾固弗可悔觥觥翰林集落拓天
寶載人觀賤如泥自值一千琲

山田久欲坼水縣遭滂沱我行遍燕趙復向天南過蕭條間耕者太
息饑荒多耕田尙如此不耕將奈何我有十畝地介在城東阿先人
所歸憩宰樹高嵯峨大父營後隴故妻埋前坡割贈張生者又前臨
大河鑿池繞墳址河入爲清波魚秧四五石藕大生高荷茲方但可
樂不復能栽禾

聖賢何常施要在心胸大令今生邱軻小小亦如我少陵憂憤辭見者歎婀娜他人輒效顰不覺眇且跛太白佞丹砂子瞻說因果兩皆有至味互易且不可空空範雅言敗絮金銀裹人於萬族間一族自爲妄歌斯哭亦斯吾不笑其瑣乃至十百千附著益以夥歌斯哭亦斯吾不嫌其過嗚呼此亦難畢代爲私課

散髮一扁舟飽讀相如傳亮哉漢代師斯人尤可戀堂堂六經旨語貌壹已變妙設不可機待彼帝自轉耿此剛直腸而帝特驩忭遲君十年死漢豈有封禪將令漢不文君亦無由見

道人北山來哀吟望鄉國言過太行顛虎豹懷其德三年遂止留豹處而虎食道人持正法不信有鬼蜮有亦不能克一日爲所賊道人作而起虎豹無顏色嗟茲獸卽馴異類究同域虎蜮更相使吼怒那

能測君今幸而歸吾思歸不得

今日非昨日昨卽萬古前來日非今日來卽無窮年來日吾嘗在昨日何存焉道人通大化惟此乃惛惛日日有俛仰諦觀而後還可知
山日永曷怪山花妍

秋日不可見冬日何淒涼涼熱氣所使日者徒有光乃知地道大感時爲行藏卷懷一自煖萬物皆皇皇安得長春節生民感艷陽

騏驥在霜野哀鳴不可聞生平已弗道那更饑如焚中途謁鴻雁忍恥將爲羣飄飛故能得體大徒紛紛一覽窮荒耳安能畏足輶

悲哉孔子沒俊類將何歸猖狂故無倖薦笮緣何譏宋後一千載雄書慘不輝晚俗益以駭爭能排顯烹吾雖客元甚不喜聞若辭悠悠反覆理到此焉可知微末於何託相如是我師

秋庭午吏散藹藹冀州時聞籍相炫耀遷雄相諾唯彼軻相責難輩
軾相阿私曩時屈莊氏並代無聞辭相如遷共使作傳因相知甫白
長相憶宗元使愈悲在宋更相阨何曾客友師茲驢亦已泰吾意固
當離

秋日在梧桐伯仲語爲別悽悽復惻惻中夜不能決我有金丹方告
以鍊藥訣茲方遍可療不療腸中血齊來江漢間彌望隔風雪間言
汝病回糜粥已可噉冥情遂信之西舵復東折人生壯大年骨肉真
懸綴安能苦念君不自愁肝裂

我欲往滄海言之吾母驚吾父笑謂母惡謂斯兒誠哀哉弗可試且
笑烏能傾老年重骨肉頓覺饑寒輕自寒自饑餒百口還須營老人
食幾何愷悌流州城關門閉游子曾無金在囊城門五更啓城上烏

宵征茫茫眺遠野不見故畦橫歸飛不得哺繞樹寂無聲

前日石上松佳哉氣何旺五年未見君喜不受人創吾有同根生兩
株復已壯一株移就君一氣若吾曩燕中好木稀南國瑰材廣盤紆
幾萬峯柯葉互相讓誰當異姓交惟此不能忘

日出堂上飲日午賓客加日斜辭半客有賦爭同車明鐙萬錢費更
醉顏如花當時吾却喜但覺宵無涯促促板船底嚴寒戰齒牙身爲
浪拋擲走臥但如蛇以是最文字窮幽極八還能過一千日不復慙

其家寄語同懷子眞當爲此嗟

是時與蔡燕生別未久詩成
卽寄之故末二首以彼結也

曉發廬陵漫成

郡國江湖底城池山石邊人烟爭逐市風景欲除年歲比三行役今
來四易船撫時眞惕若爲客轉蕭然旅夢宵無定詩心日有遷鏗除

生懦習椎擊曩豪篇鬚笏思能銳貪茶味故圓遊詞參雪意落句慕
霜天坐挹他山妙淵懷吾道賢澄清見灘水迢遞隔墟烟善化明朝
覽佳期後日懸生慙樗散質臨寵益悁悁

入灘河易舟聞舟人言往月安福使人迎探狀慙恐彌甚心神
益焦輒復爲詩十九韻

順康元老家乾嘉大儒系道咸名公孫同光詩人子藹藹敦詩媛持
以配當世當時却不言咄哉吳刺史持我烟霧中德我亦已詭令今
尙在途吾獨望公耳金陵逢諸昆玉樹得相倚依依訂後期期在月
建子豈知歲寒累隔月不能指紛如敗葉多掃去復填委江流入大
湖湖窮見灘水一月四易舟偃蹇莫能駛已聞安福君迎探日有使
人生重然諾大諾矧可爾感此宵寐淹對燭彌慙已韓公詩萬篇矧

也數十紙培塿附泰山不爾將安恃伐肝取新作急索勿令徒持爲
到門獻燕咎庶能理

成婚有日內子爲詩三十韻以道其相與爲善之意與其迫欲
侍舅姑之忱余亦作三十韻答之

吾昔山中年恐懼畏人識一詩落人間遂爲吳公得苦作珍奇收過
求美珠匹輾轉歸丈人逃藏更無術丈人氣淵淵諸郎勢英特或戰
或養之吾意固低抑誰令吾子來咄咄更相逼房有刀劍光入我常
懷慄雖然憚爾才豈不戀爾德惜此蘭蕙芳不得在親側吾親天下
慈作婦百無值身御必蕭條好婦美衣食獨恥家庭間一體畫數域
曩人非有奇覽此將身克遂得親堂驩死去立爲則吾寧誓獨深滋
恐後來忒苟合豈不危吾忍將卿失丈夫貞則凶物理靜而吉極冬

放春回冥靈始能茁驪言告吾親不復慙其筆子有懷歸忱能使我
心惻兩盡無公私在處必愛日吾親日中昃子日在西北不得事尊
章宜盡祖孫職古人君父間隨分蓋無憾子有翱翔時我無奮飛翼
明星爛在天鳬雁不可弋與子今偕潛靜言撫琴瑟瑟琴瑟鳴悵悵寒
水流汨汨服勞亦爲君與子花間逸

安福試院登閣和外舅

高閣出羣間深杯一撫欄風烟環作態冰雪對爲寒時鳥他鄉見初
花倦眼看不能望江海空自說長安

試院枯柏

大隄千萬柳繁葉媚春禽獨爾偎寒色因之見苦心危巢知有路禿
樹豈無音蟻子當年窟嗟爲暮雨沈

和外舅關字韻有懷摯父先生

南來消盡晚冬寒却對春風靜掩關羅帳已懸千載月紙窗更受一
城山丈人蕭瑟餘清興賤子飄流得暫閒日飲無何能忘遠茫茫燕
趙碧雲間

就試院觴外舅生日卽席獻詩再次前韻

試院沈沈銷薄寒傳呼進酒釋重關難爲大海驅羣水獨與諸峯拱
一山仕宦平生謀食苦文章老境用才閒再從循吏歸文苑萬歲千

秋父祖間

石市先生先入國史館
史傳後乃改歸文苑

與仲實論詩境三次前韻

詩家王氣必深寒秘鑰誰能拔數關龍虎相遭風過水鸞皇自舞雪
盈山眼光料得千年在心事無由百道閒與子婆娑見真意公然一

臧杜歐間

送叔節北上五首

不嫌君去早獨恨我來遲
急景將年換深談及路歧
海寒冰未徹江
永雪方滋苦語思家會應增念我辭

宵來一尺雪慷慨泥君行
便復鏖吾約焉能送此情
長吟敘事懶薄
歸使眼驚疊此艱難意啼呼夢弟兄

放手吾何吝常爲隔歲歎
知言真不易卽事况多難
重以文章好真
當骨肉看北方無此酒往矣不勝寒

一卷天人作風塵倦眼開
坐於霜月下祇待鳳鸞來
山木知能壽陂
蘭又可胎低徊正無盡車馬漫相催

好事羣人羨當車未敢悽
惟應九重下一使萬夫低
黃菊循歸路青

山覓峻梯龍眠知有屋還及爾同棲

同外舅登樓

山川文藻仗公來五斗生涯亦費才
挂席未能滄海去拂衣同看好樓開
韓鵬調熟爭紅粒鞍馬消閒踐綠苔
眼底春情何假蹇平生蹤跡未須哀

與蘊素聯吟樂甚因而感懷前室誦其遺詩忽復與之流涕蘊素用前韻余復次之

牆外羣山擁髻來牆隅花萼接莓苔
鳥啼清脆蜂聲煖龍井香甜蟻甕開
好事只今疑過分悲歌對子不能才
一篇殘稿嗟何吝十七年間事可哀

驟煖出眺還復同外舅登閣次韻一篇

南方天氣多炎蒸。驚蟄幾日薰風生。春乘夏氣一何銳。昨日枯柳今朝榮。竟把紗羅易裘服。灑然出眺心神清。此邦山色亦佳絕。往往峭拔無低平。城根滅沒不可見。微見粉堞當疏林。有亭翼然欲飛去。陡絕不知誰所營。丈人官此亦良得。但祝老母娛千齡。南楚北燕吾涉過。茫茫獨嘯誰同聲。三十已防浮譽起。四十欲將高隱成。隱卒不成。譽亦少。每年還爲饑驅行。無官弗求有弗棄。從人覓食徒荆榛。冀州食我亦云泰。一旦自休仍割情。天津橋上春如海。仙李枝頭溜好鶯。怪底白鷗性殊絕。不能浩蕩姑銜冰。爰居却有避風智。精衛難將滄海更瓠子。名爲封禪瑞柏梁。又主鉤陳兵。天心茫昧豈能測。三公彌亮知權衡。嗟我與公但相照。宵來璧月如華鐙。肥酒大肉豈足惜。名子快婿齊稱觥。

卽事三絕句寄仲林江夏叔節京師

時暖時寒不易居
養生經緯况多疏
山妻爲我調羹熟
更與神仙却病書

鳳啄山頭數縷烟
移時變作雨雲天
輕雷出土知非遠
剛在東風楊柳邊

莫雨絲絲更柳絲
思家望遠總相思
楚山密邇燕山遠
輕煖輕寒各一時

諸君戲爲唐字韻
韻凡三疊余亦效之

美人冰雪共詩腸
日對名山喜欲狂
不解朝雲無限好
空將大體賦高唐

一家兄弟錦爲腸
更有陳遵入座狂
不信人觀賤如土
朝來珉玉已

旁唐

老人心計儘回腸我道洪麻莫厭狂不見萬株琪樹裏鳳皇巢閣醴
流唐

外舅朝出門索余半臂已又愁壻冷而送還之並示以詩卽呈
和作

冉冉春陰在朝光欲霽難嫩蠶資葉大乳燕護巢寒舊國龍眠老空
山鳳啄殘但憑兒女意高枕一求安

外舅勸當世與諸子爲詩文每五日一會則具佳饌相勞又作
詩一篇以欺喟而欣動之當世敬述愚意爲和章

春明碧天好奇禽弄光輝誰能撫其羽迎問秋所歸翩翩女床子性
命何輕微微生亦何限莫作蜉蝣衣沈沈碧海底吾欲圖南飛培風

蓋有力遇化亦有機藹藹前山暮春分月滿扉啼將鳳鸞血膠瑟鳴相依我歌丈人聽終古不相違

仲實相拉出游病嬾不行作詩自詡兼和外舅遮莫敲門惜大慙之作

樓閣飛空山帶郭安成風景是江南一旬陰雨將春老三月濃花對影慙寂寂書城還自擁茫茫烟海問誰探平生積嬾成高蹈那得清游更不諳

戲答韞素見慰詩次其韻

鴟夷腹大枉如壺藏水盈懷酒無久病焉知藥良否懷人經見草榮枯春蠶漠漠初爲繭宵露瀼瀼漸有珠早晚庭堂與歌笑平生志事未全輸

奉和外舅積雨感事詩

興會乘風雨哀吟撼筆端老懷憂國切生計入詩寬
薄宦一家在炎方五月寒酒餘仍健飯惆悵問齋盤

嗟我猶浮著誰能但感時坐看桑葉盡徒爲繭絲悲
翠袖凌寒薄紅粧照夜疲悠悠山縣在何處覓長離

端午卽席和外舅

斯時吾已自覺病甚不可支
諸作皆強爲之故末句云然

策馬屢過張耳墓乘舟三溯禹王祠平生偃蹇詩無草
十載飄飛命若絲慘綠今來承壻寵雄黃故事與兒嬉
我無官秩煩天校但祝神明弗早衰

外舅屬馮君小白畫東坡十六快事而命當世爲之詞
嗚呼境亦多端語非過分自古以爲難得至今懸於畫
圖丈人則蕭

瑟一官賤子亦飄零萬里新綠軒之風雨使我淒涼挂車山
之日月從公想像流連見志拉雜寫懷行李匆匆卽以訴別
晨興半炷名香

春夢爲烟繞碧山曉鐘如雨擊空寒此時清絕焚香坐滴盡花梢露
始乾

午倦一方簾枕

啼鳥悠悠還自去清風習習不爲譁勞塵車馬知何事一枕南柯日
已斜

飛來佳禽自語

人語嘈嘈不可聽紙泥冰炭總無情不知何者爲天籟乍遇空山一
鳥鳴

乞得名花盛開

手發千葩固自妍
從人攀折亦欣然
君看萬樹籠頭雪
始覺孤芳絕可憐

接客不著衣冠

黃鸝白日成何事
墨綬青袍祇可慙
今日病軀纔一放
縱無佳客已回甘

客至汲泉煮茗

山居習懶更無文
但語兒童見客勤
客爲主人消積渴
主人留客至斜曛

花塢樽前微笑

材力真能敵萬夫
眼中仙佛亦區區
莊生化蝶今無語
直任東風勸

此壺 吾斯時已病失音

柳陰堤畔閒行

山水空靈草木香
郎官湖上聖湖旁
當時盡裏垂楊柳
多少離人枉斷腸

雨後登樓看山

樓閣沈沈水氣寒
雨餘空翠欲平欄
故人滿地波濤怨
一髮江南屋裏看

暑際臨流濯足

通守當年避暑忙
畫船簫鼓水如湯
可知事事爲官累
官去身慳水自涼

月下東鄰吹笛

好事無須一錢買更爭千萬買鄰錢君看宿鳥離巢舞尙自飄飄意
欲仙

隔溪山寺聞鐘

上方禪悟夜鏗鏜越石穿林似不同更度溪流帶清淑教人浮世萬
緣空

清溪淺水徐舟

藹藹溪雲澹若仙循溪水鳥不飛烟定須閱盡風波後回望江湖始
可憐

涼雨竹窻夜話

魂夢音書盡渺茫眼前餘味要深嘗可知昨夜傷心雨明日相思仍
斷腸

開甕忽逢陶謝

天遣詩人會一樽無端清興欲飛翻可憐北海賓羅坐尙有心情到
虎賁

撫琴聽者知音

已分窮山自晦藏暫時欵洽不能忘碧雲黃葉尋常語愁絕當時范
履霜

贈別陳蒲仙嘉穀次其韻

肝脾數數病支離慚愧風前黑鬢絲聽子良言當去累未能遽別且
爲詩匆匆入室年將半怏怏當門路卽歧南望湖湘東去海灘頭明
日起相思

江湖行盡覺才難撫我哀絃爲子彈一世祇須平淡過百年莫作等

閒看眼前詩酒人情厚天下風波客路寒任使袖中名刺滅弗教我
語字先漫

贈別閑伯

大兄詩味好王孟恰相宜行矣強加飯傷哉不遇時艱難爲舉業浩
蕩問前期烏得南山僻遊思極八陲

來茲半年久合作一家清兒女皆依我弟兄交勸觥日長悲歲短雲
臥奈天行舟過廬山下多應愴晚晴

范伯子詩集六

通州范當世

光緒十六年庚寅十月再至安福至十七年辛卯正月還家作

強病

強病支離出郭門
攬衣愁歎數烟村
不知眼底家山好
且喜胸中老酒溫
月被風霾微有暈
天連水色更無痕
乘潮卽去吾何奈
回望親庭欲斷魂

吾聞燕生道熊香海有年矣
至九江遇之夜談贈詩卽次其韻
江漢同流到此深
匡山石室有龍吟
只今香海歸吾袖
奚謂肯堂猶子衿
白也平生最蕭瑟
謝公行處試登臨
君看濁世螺紋現
安得悠悠稱我心

香海贈以所著論詩雜詠稿三卷讀而酬之疊前韻

泛覽諸家料淺深江河萬古發高吟
從容此日論三昧快事當年棄
一枰鑿空山河皆地接浮天星斗少人臨
子雲覃思渾無賴頭白方能構此心

燕生香海同遊甘棠湖之烟水亭論詩頗洽而語及時事乃必
不能諧香海不復顧聞輒復拉觀其壁間舊題而索和焉余
卽依韻笑作二首一譏香海不識時務一並以吾州之水西
亭傲此湖也

結蜃樓臺起莫烟出塵壺嶠九江偏暫將苦茗捐煩慮更對甘棠懷
古仙與子囂囂難避世生今歷歷可談天
君看島嶼羣飛鳥掠樹窺人智尙圓

嗟吾謀食天南北辛苦勞塵却倦遊往與山妻明稼穡歸當野老共
春秋難拋舊愛於茲戀更締新交爲爾愁安得翩然偕就我相將同
泛水西舟

不堪

水師伐鼓聲猶壯舟子彈絃韻轉悽我已無端橫涕淚不堪蘆雁再
三啼

回甘一首將以示叔節叔節市離家懷內有淒涼臨野闊清切
覺霜新之句余最誦之

病久愁深容又單開門祇覺萬重寒因君野闊霜新句遂想回甘至
夜闌

叔節在安福盼我久矣我欲山行而病不能強避風又不可耐

誦其詩依其憶昔行韻爲思叔節一篇

我思叔節不可聊一夜無眠聽風水叔節思我其如何耿耿丹心在
詩裏嗟吾與子忽然親謂天不仁天固仁萬物淘淘道將喪願翻百
代求其真攀天下視嗟何極並駕扶攜必有人一馬從來悲遠道爭
先接迹斯難馴子之文章若冰雪已有聲名揚鳳闕世上安知學道
心斯人對我方愁絕冀土榮華亦等閑瓣香前哲無休歇悠悠逝者
幾千年句留文字如浮烟淺淺嘗之淡如水耽如食蜜甜中邊耽此
方知能不死瑰然大欲憑虛起作者牛毛成者稀差以豪釐謬千里
君家世世皆有聲天下舉目姚桐城摩挲先澤與人共豈是尋常伐
木情嗟我於今弗可道發憤編摩苦不早且爲不謬當如何眼看頭
白歸於掃病後慙慙彌可憐家無儋石錢無錢親心樂道妻兒曉百

口焉知命在天十年奔走天南北漸覺形骸畏車轍積病支離到肺
肝便歸無力耕阡陌平生却負張吳劉天之所限人難求惟應傍此
終吾世或者前言不謬悠與子成懽在歧路兩載淒其隔烟霧諒子
猶爲昔者心不知吾力今非故朝於湖舫哦君書天風激蕩鳴瓊琚
廬山萬仞高不極欲起病骨乘山車乘車守風日惶惑惟恐子又歸
鄉閭噫嗟人生天地各亦適何必連宵達旦長相憶

行過南昌念且與內子相見彼其懷我也積詩成卷吾豈可遂
無一言而茫茫昔意又何從關取以爲辭乃借歐陽公贈其
夫人班班林間鳩四十四韻譜而成之嗚呼吳翼州之爲吾
兩人作合也則引歐公薛夫人之文辭相悅白首相賓以速
吾之就故吾亦得而效其詩也而吾命窮矣

我之弗思子以昨病艱日孤篷野水間生死勢飄忽一哭皆棄捐空
軀使之沒方知平生心猶是血氣物陷落肝脾間孤提不能出何但
夫妻哉一一皆已畢當潰弗復攻生機轉來彌俄延復至家扶攜跪
親膝問故暗難陳思危內自慄棄捐謂之何大罪不容劾仰觀親傍
徨俯益自寬卹庭堂弗可居鄰廟假一室喘汗秋陽天何由得蕭瑟
畏見衰顏親祇可弟兄姪兒動則麾之況也所深嫉隔廳無履聲鄰
語變啾唧嘗脩一日禪圖博半宵逸欹枕雲雷興合眼風濤颭十宵
成一寐有夢在虛實何堪當此時見爾悲相失無因而至前此事真
咄咄嚴拒弗思之懷藏亦已密心神纔一交驚魂自奔佚吾欲鏟根
株寤寐苦不一寐卽聽其然寤乃從吾吉久之爲石人混沌還吾質
嗟吾非子讎深恐累斯疾譬若昨無身焉得爲子匹插足輪回邊歸

來可自愧親養幾不終吾罪當斧鑕傷哉一年情烏能爲子述去書
十二三已恐子心鬱大義均悲愁兩地嗟何必今春得素書苦語調
新律吾作他人看疊誦轉驢溢秋間病再深不願觀卿筆書來閉篋
中編在某甲乙十月冒霜征辛苦若鞭扶瞬復同閨闈念子何秩秩
白髮擾青絲吾當爲君櫛君亦聊相娛珍鬢自加髡暫倚君堂嬉從
容返蓬華吾從衰病餘不復望簪紱所嗟惟別離那得便窮乞

有懷謝渭巖於竹岡青因及香海

人間處處鍾靈秀沃養滋培各一叢俯仰當前消白日蹉跎老去咽
悲風古來聖哲懸天上薄海珍奇會土中嗟爾竹岡青易了烏能卽
使渭巖窮

江西橫亘一千里山水滂沱入大湖山倚渭巖撐快閣湖迎香海走

匡廬我來前後經三載於此東西得兩儒便約半山造山谷攜樽同作醉翁徒

追悼武邑蕭孝子

蕭君藹藹蹈中庸一日身投烈燭中天不反風哀至孝人思禁火配前忠嗟余謬主文章事對此慙非議論功收轍南來祠廟歆永懷壯節悼無窮

余文債甚多而蕭孝子傳久不作亦憾事也姑爲此詩存之余在觀津書院得此事方擬商諸牧令爲建祠院中不圖歸來遂病不能往而摯父先生又去其官當時所代州縣兩勘語附於此

該縣勘得附生蕭殿魁館於他塾自給驚其母廬被焚聞難於數里之遙灰心於一望之頃知橫死以全生理洵博士弟子之殊尤

撫薄俗而得孝民亦守土有司之榮幸方當垂之不朽未敢墮於
上聞

該州勘得附生蕭殿魁畢命親庭流聲州壤蹈人間之至慟投烈
燭而不辭天道難知無孝子反風之望人情猶厚動鄉閭禁火之
哀俯鑒下情仰求恩澤

有懷信都觀津兩院諸生

三年盎水濯孤桐次第涵濡丹桂發土熱根深應自茂日長花好不
能同最憐三尺小松樹得自萬山深莽中誰與搓摩比肩直將地
籟引天風

懷松坡信都

吾家望子三千里吾去家山一萬重蹤跡益疏音問斷性情雖好夢

魂情年來不幸長空飢病後無言似啞鐘
悵望師門渺愁絕故人安得獨從容

灘河遇大風浪作

灘河惡浪何喧喧
決潏欲與湖江連
湖江之深不可測
灘河幾尺烏能然
乃知乘風借勢力
頗復揚浪高於天
有潭汪汪澄千年
神龜巨龍於斯潛
下與江海處一淵
旁通百鰓流山泉
巖風烈雪冰其顛
嗚呼物理蓋如此
對景茫茫空自憐

廢塔

我行天下雖不多
洪楊所踏常經過
遠臨城郭未得到
每見廢塔高嵯峨
鈴鐸消沈兀不語
惟有百竇攢蜂窠
當時琳宮耀丹碧
珠玉纈頂圓光嗟
欺凌山川壓都邑
幻出雲表飄婀娜
粵人所到一炬盡
獨

花落可憐百卉盡更衣猶著寒綈味玉肌書隨燕到今無慮低首依然却告誰

風露娟娟下庭冷日長一倍宵還永東方日高人未眠北窗蕉綠菱花靜啼面稍將淡粉勻日上高堂未敢嚔晚來驚電明虛幌不似螢光可畏人

去歲編籬削黃竹秋來一院傷心綠星河耿耿鵲歸巢空有牽牛藤上屋時危勢迫揜重扁欲表微忱上帝廷黃沉一樹從君伐獨聽金鑪爆竹聲

黃葉飄飄髮初落盤旋飛鳳今無角贈以蕭條百丈絲報之山海嗟猶薄晚尊一笑明朱霞烈雪嚴霜並作花可憐繡閣吟忘倦不見庭前鵲與鴉

既讀外舅一年所爲詩因發篋出 大人及兩弟及兒諸作

遍與外舅觀之外舅愛鐘鐙詩至仿效其體爰詢當世以外
間所見詩派之異而喟然有感於斯文也疊韻見示當世謹
次其韻略誌當時所云云

滔滔江漢古來并判作交流勢亦平直到山深出泉處翻疑河伯望
洋情泥鼃鼓吹喧家弄蠟鳳聲華滿帝城太息風塵姚惜抱駟虬乘
鷺獨孤征

一家兄弟擅微長那管先盧復後王徒抱雅言解塵俗頓遭溫語失
寒涼長饑老父貧如洗索飯嬌兒瘦欲尪安得華堂同對雪一時白
戰讓公強

叔節行有日矣爲吾來展十日期閑伯喜而爲詩吾次其韻

吾歸雖祇一載餘裘葛匆匆兩寒燠黃鸝三請吾不來鷓鴣一鳴春
已掃身爲暑虐不得閒愁與秋來同浩浩北雁南飛始有音耳邊聽
聆日以好令我至今猶在途君家兄弟奚不老酌酒欣然對雨風論
詩各有千秋抱得失惟與蘇黃爭淵源或向杜李討冰雪圍鑪正可
懷叔也言歸是可惱十日勾留豈不多出門一步方知少吾與伯也
獨羈孤那有心情鬥文藻髡爲贅壻徒滑稽馬卿賞郎不足道眼中
七子當爲儔或至地北天南陬安得雲屯一處留日對江山盡百甌
吾病雖然詩不遑猶能爲爾消煩憂

爲叔節題西山精舍圖

去年甥館東西間東對城西鳳啄山自春徂夏看不足歸去時時有
夢還再來此室非吾有却對牆頭悵恨久轉念茲土於我何且復得

之鳥能守磊磊狼山新綠軒打門歸住無煩言龍眠挂車婦氏物猶
許半子爲家園投身天地正多處徬徨歧路緣何故客氣已盡江湖
悲少年望爾還山去爾去西山來侍親猶對新居懷舊鄰可知能作
山川主不似尋常陌路人鐘鼎山林各天性吾惜青山已如命難得
吾妻亦稱懷良知此事天所定此畫當年著此人冰心玉質相輝映
爾今卽去其如何爲我佳處留行窩明年春江鼓一櫓還及爾姊來
經過爾時林下風流句應比安成道上多

余再來安福專務嬉戲不甚讀書外舅行野寄詩歸命和遂綴

此篇

三更笑樂聽風雨燈有雄光屋無鼠經年苦事成驢語奕奕朝暉在
我東襟花潔白人面紅南方未臘先春風我先抱病如衰翁眼前嬉

戲還如童藍田射獵誠多事何必爲人不下中

叔節將行爲余題大橋遺照悲吳仲懿之早亡重以逝者之可

哀益覺生存之可寶疊并字韻以送之

一家美具復難并
夬角諸兒又不平
前世定爲驩喜約
異鄉先飽別離情
懸崖挂瀑山中屋
孤塔梯雲海上城
便各歸休仍絕域
茫茫江路耐長征

江草江花布景長
空明孰配水仙王
當時吳季春風地
剩有君山夜

雨涼

仲懿發名成業於江陰而叔節亦嘗所遊漁也

生別未須眞墮淚
讀書遮莫復成尫
君

歸自惜容顏看客子
從容與鬥強

三疊前韻述懷示內子

穠歿餘生拙嬾并
坐教鄉里笑陳平
已無男子封侯意
虛抱皇天不

老情萍水交親三數輩雪泥蹤跡十餘城欲耕一隴無誰乞車馬勞
勞更遠征

怪怪奇奇并一長焉知螻蟻與侯王文犀百管霜毫禿銅雀千秋瓦
硯涼獨思無身窺奧竅可能將壽與羸尪不須玉手調丹鼎吾病由
來餐飯強

外舅以初見雪花見示欣然命賦四疊前韻奉呈

寒雨連宵雪意并濕雲低結萬山平華堂白戰千年事原野青回一
歲情樽酒卷詩消壯節百錢斗米戀窮城官民一飽無他慮戶有箝
車尙緩征

所學眞非百里長上窺屈宋下歐王命遭磨竭才空老詩若簫韶政
豈涼被髮吳儂徒祭鬼失心縣子欲焚尪眼前一味蠶花粥會比當

時肉食強

內子族姪姚篤生貧而有志余甚期之於其行也既餞以酒又

勗以詩五疊前韻

岷江下與漢淮并水激山高愈不平吳楚之間猶是氣聖賢以下固
多情團沙且復成膏壤累石應能作巨城太息吾衰今已久大荒日
月儘西征

當筵樺燭與人長此樂何殊南面王對酒看余華髮改出門愁汝朔
風涼窮如至死惟填壑天不憐人莫暴尫畢竟詩書能飽腹少年須
作萬夫強

外舅方約當世以明年留此而摯父先生以李相見招傳電相
告蒲仙諸子皆惜其不久處也六疊前韻倒押之

九月臨江報始征早梅花發在山城終年望望諸君意隔歲依依半
子情流電驚飛傳好語華雲飄忽動生平勿言處士今黃潤裸壤龍
章儻可并

微文親接北方強弟子三千半魯厓一病容顏成老大百年身世忽
淒涼雲龍有意遊天地風馬何心議霸王多恐若人蕭瑟久幡然一
道賈生長

冬至席上感賦七疊前韻

茫茫歲月苦勞征懷壁何當易十城白髮著書空有願昏鐙讀史未
忘情欷歔甲子朔冬至悵望西風右北平孰使汗青元氣少惟三不
朽古難并

食粟曹交九尺強八年於外病成尪江湖到此中原盡冰玉相看一

味涼徒以簫聲悅秦女更將瑟調事齊王丈人勿悵前宵夢碧海迢迢夢正長

叔節送其夫人徐還家治病以徐舊日送別之作授當世入三
釜稿中蘊素次韻贈之余亦和之

璇閨往日弄機絲白社今朝見苦思誰似秦嘉戀鷄肋不憐徐叔病
歸時

外舅用到日饒字韻題大橋遺照感誦不已疊韻陳謝

丈人詩興百分饒椽筆還將細態描言下雙關兩端在眼前一恨十
年遙生慚凡鳥棲鳳闕長使牽牛望鵲橋三百六句愁正縈淒涼故
劍復何聊

十洲麟鳳妙材多蝶羸螟蛉世所訶琴鶴風期在塵表屋烏恩愛使

人歌吳公亦有人倫鑒詹也徒登進士科他日寒家會相見定餘白髮奈君何

和外舅速仲實遠館因而自道卽附於外舅詩後以願其行

入世諸多未了因靈龜筮我不能神披裘豈是澤中叟舉案難爲廬下人誰把清風與來世更邀明月問前身眼前但作吹竽客牛鼎康莊跡易循

屬馮君小白爲吾寫平生快事爲八圖而作詩以道其意用饒字韻

酒狂誰似蓋寬饒長劍禪衣祇自描作苦不知身世賤搜奇獨恨古人遙結交頗盡東南美娶婦能兼大小橋離合死生今白髮馮君爲我寫無聊

平生師友受恩多爲捐爲狂不我訶雨夜龍門消積渴晴秋燕市發
悲歌逢時冠佩宜三老沒代聲香共四科獨歎南軒閉塵網丹青無
奈未歸何

篋白爲吾寫快事遞增至十二圖而總題曰去影與會旣集疾
痛復來不能更端長懷一氣成詠每以鐙前小睡薄有神思
掇拾數言而成半稿或間數日乃爲一篇良知此病不瘳難
復與於著述而偶然遣興亦不求佳彙而錄之與全圖相副

黃泥山讀書

十二年前攜吾弟秋門入黃泥山之新綠軒讀書養病寄食
於僧家日供一蔬見山下有攜魚過者輒呼而指以所從入
或不聞而去者亦多

儒者稱名山以儒名耳荒山與窮儒千載諒不毀早入名山中其
人可知矣狼山非不高名盛吾所恥藹藹新綠軒相望只數里喧寂
異仙凡金焦尙難擬南疆萬車馬西去無一趾山門到者稀軒堂復
誰履蘿石牽雜花迷離夾松梓秘絕通巖扉輾轉達軒址而我於其
間灑掃布床几寒竇斷來蹤穿牆發遠視春深地不寬世亂心長已
惟珍病後軀自惜閒中晷蔬飯充饑腸呼魚那可指追維是時樂真
實亦無侈誰令襍被歸長作遠游子

狼山觀海

顧延卿之母邀吾母登狼山大橋從焉遂與之登大觀臺觀
海指顧蒼茫大橋隕涕哀惻之意不知所來而十載夫妻猶
以此爲極樂

狼山若金山丹碧迎飛蓋孤高又不同非我必自大亂後繁華空今
此亦爲最亭亭大觀臺江海之所會少小習於斯手口俱能繪惟獨
閨中人長年鬱塵壒徒有千秋心無由得知外一日登於天酣然淚
滂霈微生天地間離羣復何賴此意深難言我亦愁無奈焉知後五
年君已如蟬蛻登高痛哭之風浪自礪礪離魂不可招酌水吾何酬
留影丹青間璘斌亦何害

龍門雨夜

題圖卽節哀祭劉先生文云龍門弟子孫點以書來告曰先
生念子子不能來則先生就子矣於是當世以秋八月往先
生窮日夜之力而與之言於其將行也而改定所謂觀炙記
言者七紙是時大風雨夜過半渴而思飲當世執燭先生挈

茶具之竈下而火之飲而旨先生喟然而歎曰此樂豈易得乎吾老矣逾明年將寓食於汝所謂黃泥山者以鄰於汝以遂吾之志

遊子初辭家尋師却至滬師說萬餘言先入以爲主後來饑困餘仙家乞鱗脯當時却不然初若嬰啼乳乳脯味敢歧恩勤有獨苦風夜培成心千秋淚如雨

泛舟秦淮

張先生在鳳池書院每攜當世及其子導岷會叔泛舟秦淮光緒六七年之際也

一帶秦淮水千秋脂粉香鍾山草堂下自古聲名場姬傳昔駐此閭澹無華光淪沒百年後傑興得湘鄉揚舲載賓客宛轉聽吳娘當時

煙月好山川有主張蹉跎僅十載不得同杯觴觀面成私淑沿流到武昌垂髫應鄉舉十度秋期忙繁聲與縹色到我皆頽唐惟以清游

會同歌弔渾茫

余十七歲赴江南鄉試猶及見曾文正公叔任及來師武昌距公沒僅十載耳

水心亭宴集

故鄉朋友之樂莫盛於光緒五六年間水心亭宴集蓋常事也大抵晨夕共者吾與馬勿庵顧晴谷王雲悔時時至者顧延卿顧滌香裴英及吾弟仲林二三至者周彥升張季直朱曼君若樵秋則一至而已今勿庵樵秋既歿而里中亦並無一人存者

朋儕似骨肉亦復如雲烟茲圖所列繪並在懂觴邊飄風攪其伍散落烏能全逝者已弗念生存各澹然自古皆如此悲來不足宣羣人

之所聚能爲風氣先十夫閉門造百萬誦其傳青黃不可紀一白胡
爲焉覽代惜情好撫衷懷罪愆懸知百世後難比古人賢滿地江淮
海沉潛亦有年

蕪湖附舟

余館江夏樵秋館蕪湖出則俱出還則俱還每年如此有一
年未約而舟過蕪湖樵秋亦適來附舟十年之懽此爲最

尋常萬懽笑一端何足言故交十數輩胡然獨不謖此人實可憫此
事真當存老年罷官職投憩無家園逢余以爲命徒步相追奔相依
不相活各復投朱門歲窮一歸併笑樂爲吾昆精誠所牢結訢合常
無痕規當永如此一日感偏反交滿亦爲累至情多煩冤生死不能
盡何由訴子魂

琴臺夜飲

此漢陽琴臺余在江夏時柯遜庵生日謝客邀余與蔡燕生
留此兩日夜對郎官湖痛飲弗張燈也

峨峨黃鶴樓江漢兩來趨龜山壁其右右有郎官湖湖窮得精舍隄
柳千萬株乃是琴臺蹟古賢所遺餘曩及柯與蔡晚尊坐此娛風從
墻外過月在湖心孤清寒鑑毛髮氣誼同肌膚吾行天下半不肯浪
有徒蔡乃兄事我柯亦弟畜余逃塵謝人跡惟此三人俱此宜若金
石吾心更不渝如今各天地貴富或相踰魂夢豈不到琴臺定有無
燕南並轡

余自冀州同摯父先生就廉卿先生於保定車中困頓捨之
乘馬先生亦乘馬並轡相語不知曉寒

鞍馬真能健讀書方不慵我生幼疲茶宛轉隨吳儂二十叢書史發
憤忘殮饗三年閉野館百病來相從從茲一放散日近市人胸名聲
羽毛長願力霜蹄鬆茫茫冀州道騰踏遇真龍低結若可並高情未
許慵官中念師友車馬犯嚴冬私心惜髀肉對面聊從容自笑強顏
甚還來繪昔蹤誰能換筋骨白首與橫縱

冀州城樓

此同摯父登西城取涼而姚錫九張采南吹笛事也

平生耀眼處忽然永留情冀州吹笛夜曲盡以詩鳴當時雜羣感過
境懸孤清獨有人難得尋常只月明遙知今夜月仍在冀州城人散
歸村落絃歌餘幾聲

塔院養病

吾去年病甚矣坐此間五六月殆如泥木人所患者雖弟
及吾兒不知也然至困而暫解則此時便最懼是以從宵達
晨自午至莫亦時時有至樂存焉蓋昔人云病中增道力危
處見天心誠有味乎其言之也而境地清絕晨鐘暮鼓之外
無纖芥之來前此尤可暫而不可常一入塵寰則回首此間
亦愴然如新綠軒之不可再得矣

吾繪十一圖十快一不驢驢盈變愁苦天道見其端至苦有驢在君
子誰能殘吾病非言狀言之亦苦繁惟茲老生語常在胸中盤人生
夢幻處數反惟家門泡影久不滅亦惟親弟昆禪悟所不徹餘生又
可論誰知病中景能役異鄉魂

安成玩月

此圖卽繪丈人署中景

吾翁非常人平生與鳳麟咸同聖賢際了然皆所親以茲厚詩力迴
出千家屯一官如糞土百代關其身生雖託名父德由自苦辛小子
所深願乃公父師倫天地忽遲莫山嶽餘孤春相逢各有慨語笑都
成珍丈人非姚合婿亦殊李頻對面傷心處寧關紙上塵

航海北渡

此預設吾與蘊素航海北渡景也舟中所指之山卽吾與大
橋隕涕之處魂魄有知見吾與蘊素之歸來悲乎喜乎

車船何太勞山川莽迴互山川無變更斯人自新故新人爛明霞故
人若宵露懸之山海間前後不相遇我身亦乘化那能自堅固泮生
迭造因涉筆偶成趣構會虛無中無人解斯慕魂魄難可招容華要

深駐指謂吾妻云此是還家路吾往還當游子今託翁嫗莫學故人
愁愁深不我顧周流良苦辛歸休自調護

閑伯送余至廬陵途中作贈

釀別經旬別始成抽刀弗斷更同行怕縈春草池塘夢何止桃花潭
水情比德可悲元氣少澆愁獨使酒杯盈吁嗟前路終當反辛苦
與復兩程

舟中元宵疊韻再贈

兄弟連年有遠行茲番勞苦見君情春初暴煖裘爲累夜久深談夢
不成路轉灘河山未改村明燒火月初盈驚心令節娛親日况我離
家四十程

舟次廬陵閑伯兄妹將別泣不休余呼小妓作歌以亂之又手

書二絕促閑伯過舟

漏盡更殘無奈何更憑小妓唱離歌無端欲住傷心淚撥動哀絃淚
更多

春水滔滔更不留離人半日泥行舟雞鳴月落吾當去拼對江山一
月愁

南昌城外眺望回舟作示蘊素

往年三至滕王閣年年陰雨舟中住今年發憤欲往游泊舟銜尾難
登路更棹小舟浮浪間周迴萬舸終無罅日暮烟深何所之僕夫皇
恐舟人怒隔江似有三數家掠檣斜飛向西渡軟沙著屐恰已輕野
廟尋僧亦微趣回首却望章門都明星燦燦然燈初崇臺似有行人
趨黃昏望絕不可呼珠簾畫棟知有無文采風流不到吾寸步有命

今弗圖四上不至亦已夫還及吾子尋懽娛

蒲仙送余至南昌去安福六七百里矣盛心戀戀莫可爲酬而
病體懽懽不能成語天陰雨濕暫得意外之宵晨僕倦燈昏
但有無言之况味往時留別諸作病後大半遺忘別君二詩
偶能記憶因而誦之便次一首懼頗勞神亦弗更作所謂聊
復爾爾曷嘗有所云云哉

無端拾得扇頭詩往日山城怨別離會合一番今又了徘徊千里路
還歧菩提般若應無住唐棣偏反賴有思解脫纏綿兩家在滕王閣
下雨如絲

守風不行而船得泊岸蒲仙去之安福內人觸動悲懷余無以
慰之乃攜之游滕王閣各爲長歌一篇以取懽

我慙不至滕王閣子說曾登太白樓聞言使我渺愁絕何得當前懶
卽休北風一夜送南客北客稍稍泊岸頭我今爲子毀前作子得不
與我同游江山城郭非異物且復登閣覽一周閣上金書作何語人
人秋水長天句閣下諸公盡有聞不脫珠簾畫棟文可憐韓退之澹
語不成用分明作者才棄置無人誦詢吾雲君謂不然勃雖三尺已
占先誰令退之更疏懶言語詼詼足不前空藉文字與人鬪雖設百
彩烏能傳君詩莫須爲我毀君之故步真當捐嗟哉爾言豈不賢吾
今從諫如轉圜但當與爾徧覽名蹟題山川往至太白樓下一醉沉
千年

吳城訪王柳橋司馬不值記其榜門語而歸乃湊合爲詩以相

贈

吳城纜舶尋詩老聞說經年見未曾四面湖山人在市萬家燈火吏
如冰西無鳴鳥饑誰哺南有老蛟寒可罾太息幽州賤從事更當臨
路惜崔丞

范伯子詩集七

光緒十七年辛卯二月至天津

舉足一首

舉足能歸歸不得惱人天氣復晨昏日光晝軟來穿戶風力宵沈自
打門家弄近知黃菊好堦鄉空憶短籬存不如海凍江河涸雪地冰
天得自溫

悶極爲詩寄曼君旅順兼示晦若

泛覽軒窗復幾何北風塵土日經過未能低首三條燭轡却澄江一
棹歌幕府青山徒悵望故人朱紱亦蹉跎誰能撥動乘槎興迴合滄
溟萬里波

送燕生視學甘肅

世滿荒唐譽身留赤子心
吾文君孝悌萬古一苔岑
江漢深流涕琴臺闕賞音
傷哉獨關隴老病日侵尋

邱方平心坦神交十年顧
近在大沽而吾不知及其以書來索
詩又屢月而後應之仍用其集中見懷韻也

百里方平爾許疏十年神到定何如
雄軀潦倒應辭馬病腹彭亨不嗜魚
歷盡酸醎猶有累除非貨殖更無書
洋洋碧海空於鏡曷不提竿手自漁

梔子花

碧葉銜萼孰淺深人天渾合到如今
一從白地騰枝出日對青天倚樹吟
光景誰能駐窗隙吾身真合老牆陰
朱欄火炙衣塵滿惜此淵

淵抱凍心

伯行不喜烘開牡丹爲詩道其意依韻和之

伯行才氣不可當一蹴已上歐蘇堂韻頡古人豈在貌肺腑淨潔心
肝芳不喜人情浪顛倒要與一世守大常愛惜廉隅到花卉慟其早
被園丁殃思量壅培待時至聽任造物施丹黃北方天地君知否滿
眼沙漠蒙曦光一年三時在冰窖悠悠后土無春藏老蟠孤根向龍
蟄那有驚雷來發揚園丁似比宋人智突出異卉如人長一苞一金
豈爲貴陸生何不傾歸囊我悲寓園太蕭瑟每欲醉倒依公傍豈知
金碧樓臺下也有寒人抱雪霜

吳彥復武壯之子也余兩度客武壯所未嘗受其一錢而未始
不互相重彥復以此仍世交余彼困於京曹而過此南歸又

不得已而來此終無所得迫於歲莫特索吾詩以行走筆奉
送

海寒不似江南地嗟爾何因去復來環海九州疑有路平津東閣豈
無才翻思乃父三千客我欲娛君五百杯桃李無言花落盡茫茫風
雪一興哀

先立秋一日同顰父先生舍弟仲林登寓園臺玩月同賦明日
舍弟行矣

明星三兩月華傍北斗迢迢是帝鄉一地晴輝何皎皎九天正色自
蒼蒼奇雲忽擁連峯至清露稍將大火亡所惜秋期在明日南飛鴈
鴈欲成行

天津節署有小園登樓晚眺寄仲林武昌秋門京師

一爐香篆不禁焚起上高樓又夕嘔綴樹紅棚猶似火飛空黃葉已
如雲從看北斗看南斗合憶辰君憶酉君愁見鶴欄高出地不如鵝
鴨下爲羣

賀新吾子娶

長至後三日中朝第一家門闌多喜氣京輦動聲華欲借天孫錦重
開仙李花遙知南極老植杖興無涯

乃父真吾友淵源夢范居科名晚垂代佳氣早充閭看汝烟樓撞還
將湯餅儲秋期桂林一應在試啼初

三月二十六日言寶博僂行援士相見禮以詩造余寓廬明日
遂招之飲而詩未報也閨再旬復以其所爲訓周曉芙詩波
及於我而督和會姚丈人來異其爲人乃招之飲而同和之

莽莽風沙溷此身眼明雲水得斯人今無古有士相見花好日長天
莫春豔餅聲明聊啗俗傾河意氣對披眞驪舟正好吾同發別一仙
源許問津

白頭歲月贊羸蹄悔盡平生羽獵詞生晚有天皆可問處卑無地竟
何危周郎年少虛憂世姚合老人能詠詩錢盡流光足珍惜庭階花
影日南移

余既招饗博同姚丈人飲而客以丈人新到候者衆室不能容
乃相其可逐者而逐饗博以去客散乃各爲二詩詒之饗博
亦不望也而卽夕酬還四詩其意益深遠而余所欲言者亦
益多再次其韻

清尊微雨息勞歌一老蒼顏爲子醺宦囊眼看孤劍在寓廬剛祇半

弓多填門與馬公無漏絕代宮商手自和燕去雁來渾聽慣摩空唳
鶴數聲過

絃歌世業本無倫憂樂區區未足珍駿骨千金龍馬市微生一髮蠹
魚身吁嗟但覆杯中酒骭髀能看紙上塵安得傾翻六經液化爲草
木萬家春

百年學子數門風左海淵淵北斗崇覆瓿文章一家在悅芻心性萬
人公君無議此國冠上我欲忘之代伍中杯酒細論真樂事人間回
首有西東

埋塵匣劍老無華不道干將况莫邪寂寂生涯猶賃廡茫茫吾道欲
乘槎康衢角起三騶子侯所爭爲四皓家披草微吟亦何礙莫將新
句淺籠紗

叔節寄詩言愁蘊素設兩端以慰之吾則率吾之臆而已甘苦
實不相喻不必謬附知己亦錄相視以當反騷何妨

貧賤吾真可離家亦不難秋風一長往霜雪萬重寒聖遠言猶信時
衰僧亦官古來鴻案下生死得偷安

果腹論饑飽吾生竟不難狼求終不已貂襲亦生寒豈况羈孤士無
望措大官茫然真自慰百鳥未棲安

屬畫工畫一少年侍老人團扇題一絕以贈賀丈蘇生松坡之
父也

行歌燕市不能狂四十由來鬢已霜只與吳兒漸殊好每從黃髮一
徜徉

遇姚大令錫九天津市上卽夕招余飲贈余詩已而在青縣道

中又連篇來促和次二首答之

莫道鵷鷺不可囚悲來王粲只登樓一番離合情如昨四十飛騰鬢
已秋浮海妻孥閒處著望雲親舍夢中遊因風正憶絃歌宰宦況年
來勝我不

羅得飛鳬入市迎當筵更試割雞筍長年製錦成何用一賦凌雲始
有情結屋樓臺塵霧滿啼鴉桑柘暮天清詩來發愧蓮花底不及春
潮野渡聲

章定盒循吏也外舅安福君亦有長者之政招之同飲而談民
事其有味可知而定盒乃好談命所以歆動我者前後數十
百言明日復爲外舅兩少子評鷲英異而走書自炫立索好
詩爲酬外舅爲四絕贈之余因和之

冰玉相看一味涼更從廉吏酌寒漿分明乞與黃梁枕一夢酣然到上方

地北天南各有行對觴甘苦語平平可知當日南陽守只是人間父母情

買牛買犢耕田好府雀亭豬未算能獨有此公爲漢相可知宦海不飛騰

風流豈學畫眉張憂樂平生亦渺茫莫向君平問消息故山老我有藤床

外舅用山谷松扇韻題詩刻諸竹扇上以與當世敬和二首

誰歟削竹薄如紙入手沈沈片玉似丈人惜此鴛湖珍割捨清涼與半子雕刻冷句加送寒何如右軍在戴山五字清新百錢買一風遼

絕千年間

日炙窻紗雨淋紙人簇其間蝟毛似萬蠅結隊復來乘靜勝能爲姑
射子江南六月夏生寒大竹捎雲陰滿山削伐餘姿亦何賴碧琅自
照鬚眉閒

疊韻述懷示蘊素

日在朱門鑽故紙童牛角馬知何似王陽豈有黃金鑪閉戶眞能對
妻子西風八月天將寒桂樹飄香徧萬山我亦好生而惡殺處夫材
與不材間

送外舅入綬章支應局仍用前韻

相庭夜下一尺紙饑人如得赦書似十年兩度專城居可見身非小
家子麟祖鳳逝天日寒烈風吹倒天南山寧知烏雀殘燕裏乃有高

人黃綺間

徐丈椒岑示以所著黑龍江紀略感題一首卽送之東邊

一壑艱難未可專荒唐老去更籌邊平生揜鼻爲公詠昨日開懷讀
此編孰使管甯去遼海更無箕子在朝鮮蠻夷白弩君難造莫復登
樓望土田

天津問津書院薑塢先生主講於此者八年外舅重遊其地感
欲爲詩乃約當世同用山谷武昌松風閣韻

有文支柱山與川恍人有脊屋有椽我立此語非徒然眼下現有三
千年遠矣周孔隔地天手語目聽交鳴絃五德替代如奔泉掃去碌
碌留聖賢此事擔當在几筵耿耿一髮天宇懸丈人家世留青氍毹文
字碧水流潺湲從來不與時媚妍薑塢先生此粥饌百年喬木參風

烟公來再飲唐山泉龍堂蛟室來眼前吾今只可爛漫眠夢裏不須
書繞繚醒亦非爲世教學眼見地塌天回旋

鰲父先生來書勸鄉試欲以詩答會連日用山谷韻乃復效其
次韻補之廖正一連綴二編因示叔節

愛惜君心畏君口慣能移嵩誚箕斗君口曉曉不可關吾心嶢嶢亦
不還豈有當年伐柯斧舞我更置青雲間君道吾文百年上但可歐
心受君賞自古人微各有情平生不願識都城男兒尙能棄卿相况
我碌碌非辭榮年增白髮舉場裏性命區區亦人子豈不將心比父
心此但多憂少見喜君不見世上迂生得飽難有缺無門何處彈相
公厚我亦已足更用舉手將天攀不必昏人簇迷網正當開眼望湖

山

吾今欲閉談天口亦莫虛空打筋斗四十真當生死關要從人海收
身還已讀南華亦奚悔可以容身雁木間范子何爲書十上屠龍有
技無人賞此是吳公嘆喟聲乃有息壤燕南城平生知心百不闕何
獨一第爲吾榮吾命窮薄堪一士蓬萊子耶薛蘿子老與郊島相娛
嬉此在風塵猶可喜君不見賦有膏蘭保命難龔生至死爲人彈何
哉吾黨二三子猶欲捨命窮躋攀寄語東堂讀書者看取玉貌還青
山

疊韻再示蘊素

相與蚩蚩皆爲口多至萬鍾少一斗一飽以外皆可刪三時却有饑
腸還正及飽時役筋力不得填軀溝壑間吾觀營營九衢上總緣歸
博妻孥賞人生一世豈無情但當畫界守堅城墮地已分天一尺涉

及分外皆非榮天津一角池臺裏明月梅花有妻子得錢歸博親堂
懽饌有嘉魚婦翁喜君不見昔病家園寸步難手枕琴徽無力彈膽
落空階秋葉響返臥藤榻天難攀豈意飛揚有今日頗膺拙分主青
山

喜松坡來再次一首

詛汝三年不去口相逢那不五六斗自頃聞君不得閒偷入都門背
道還不知營營作何事見說殺人都市間又見秋曹講堂上赤文綠
字恣深賞一夕人影燈前橫乃是扁舟來故城開口侈陳老父樂斑
衣絢爛眞華榮我有畫扇君見否貌一蒼顏帶童子偷事老蘇坡不
知追陪十日尤可喜君不見世上英髦老卽頑悻悻古調知誰彈惟
獨而翁及吾父覓乎高蹈不可攀何不與爾從此永離散各自糴米

買書歸故山

太息一首再次韻

我聞庶女沈冤不容口乃有呼聲搖天撼星斗何哉章縫讀書美少年哀鳴失志一往不可還始知人生肺腑異我乃醉夢三年間思之思之吾不廣奚以吾言必可賞事非至愚不可成杞哭七日崩莒城李斯不差廁中鼠那得身受秦家榮誰家張冠移贈李前日山呼拜天子城南故人交致辭鄉閭親舊動色喜君不見長安令日月章臺醉不還驄馬御史不敢彈只用黃金作階級朱門廉陛非難攀看汝康衢老師老爲客一日見逐饑斃無歸山

連與松坡饗博飲酒樓談吾師之道致足樂也而周曉芙招不至饗博和吾各詩則尤美吾乃再次一首以酬饗博而通曉

芙

昔我提心常在口山有泰山天北斗匪我大言驚愚頑也自朝山拜
斗還烟迷霧淩斗山失公然目我沙塵間言子執禮非所望獨有奇
文吾知賞十年不見溫州生高人假蹇不出城謂我如今似黃九
賸不受私自榮城外酒家大魚美卓午無人二三子軒篷隔雲窗戶
涼飛蓋迢遙半日喜君不見南皮瓜李生悲酸五官哀絃獨自彈文
人會合古今惜曷况吾道須人攀吾言不爲二子改天有北斗山泰
山

二十三日卽事再次一首蓋效山谷七篇終矣

夜大雷雨至折龍王廟前旗杆

斗而朝乃放晴寒博昨期日中酒樓未告罷也往則寂無人
就近招松坡詢之乃知天陰酒爐不開改爲設饌歌者家寒
坡轉通以師弟子云屬松

雷公半夜張饒口攫我當門二酒斗轟然一醉天河翻驅走風雲更
不還我往從之點滴盡祇令陷我汙泥間故人招我酒樓上酒薄情
濃亦堪賞豈意入戶無人迎枉令渴趨頗梨城鷄鶩未化各在籠庚
桑何處呼南榮空腸自鳴日斜矣吾爲此餐望言子四明狂客懷書
來說與充饑又可喜君不見畫樓深處藏烟爨料理朱絃爲子彈晚
尊一笑子無訝絳帳清風聊可攀不用君身作霖雨阿誰指目謝東

山

香海之子錦孫入都鄉試而過我初不謂其能詩也一夕乃發
興用前韻疊五編意氣都好余雖興盡亦不得不謂乃再次

一首以送其行

昔有詩人九江口大句微吟動珠斗爾來日月何飄然好事一墮無

回還不道天邊鳳雛落忽復御我匡廬間子有瑰文滿吾望吾言深
處子能賞寓樓西畔大道橫日有輿騾走帝城酣歌未終起言別收
拾至寶徂求榮嗟爾懷奇萬人底何日九賓見天子且令受璧不與
城空手歸來又能喜君不見如今告身換酒難謀生無術冠虛彈手
皴足疲抵霄漢反望下土重登攀只有乃翁弗顛倒看渠老坐匡家
山

錫九在保定得余詩欣然更作並告我以不日道天津署青縣
當助汪貞女白金四十而盛誇近日以宦術傳授叔節慇懃
更和其詩而亦將有以授余也余覽書竟卽笑疊二首以待
之

何人放此老詩因慣醉能呼撼我樓道好原爲一官助吟成喜遇萬

家秋四方上下逐東野百里東西對上游我獨笑公忙不得還思俗吏老儒不

覆酒籠雞待笑迎揣摩興發更彈箏最憐上座簪裾客不忘窮鄉孤寡情宦術豈將吾道濟人才終數故家清三郎拜倒門牆日恨不聞吾屢歎聲

薄薄酒二章廣蘇黃之意

薄薄酒興可還醜醜婦年可賒我有好婦顏如花我獨對之肝膽無由邪我今日飲丞相家金樽漱灑泛紫霞我亦與之澹澹爲無涯出飲美酒歸對美婦世上知我爲誰與我亦不識汝誰某

薄酒可以養生醜婦不能怡情我有好婦知天心當風對月同開襟我飲醇酒志不淫何處薄醪不可斟薄酒對好婦此樂非人乃天

授婦不必太醜酒不必太厚甘貧樂賤千萬壽我自爲之命何有

寄博訓余贈荔支倒押子瞻南村諸楊一首韻余仍依原詩韻

次答和並餉以茶

三日不聞提壺盧便愁吾友詩腸枯海航荔枝一夕到迺命短僕提
籃驅午風亭榭汗漬襦此物著口涼生膚醍醐灌汝足真悅勿復暖
暖還姝姝東南口腹天下無嗟爾墜落東北隅槎枒大餅實腸胃鹽
酪不美茶芽粗道人有道服食異雙龍煮湯生吞珠薦汝獺虬亦易
盡再割雲脚分精腴莫嗤座上左元放還能立致松江鱸傾筐倒篋
吾何吝相可而授君其圖

外舅賜和薄薄酒二章意韻深美讀至俛視兒女仰對高堂不
笑而樂地久天長八句感德我之無涯歎清辭之益上有懷

不已欲和難工會與審博用荔支唱酬錄稿當呈卽依此韻

陳謝

關東門戶爭崔盧冠冕亦自榮與枯惟獨儒門世清德難可賄買權
利驅功名富貴衣繡襦妻有美惡真切膚甲第紛紛長荆棘誰家屋
裏無妍姝狼山一塔公見無寒家卽在山城隅老瓦十間百年物六
房一婢身手粗蒿埋僻巷黯相對何處得公明月珠老稚逢人告有
喜彷彿平地生膏腴不才俛仰亦以足逝將歸釣東溪鱸可憐欲報
何由報勉畫朱陳嫁娶圖

摯父先生以李伯夫人歸櫬問應來會否就吾決行止走筆答
詩二十二韻並以手寫近詩往屬其來路評也

鄉人問吏胥吾須到官否檀越問比丘佛會吾行止茲皆愚者徒欲

行卽行耳不問猶見招問有放手理天津寓廬旁擾擾已成市百喧
有一寂拂拭待公趾畿南大霖雨水深沒車軌放舟可徜徉載筆亦
能使我有一卷詩手寫十七紙烏文在繡欄公來下丹紫到日一嬉
騷勝遺百端綺愼毋廣諮諏坐令生彼此四五十人住世兩三紀
誰能老不歸分半在客裏再分客中半歲時得相倚算來無十遭更
能各行李不見濂亭翁釋手亦已弛關塞莽空闊誰能問生死皤皤
吾婦翁前日望子矣有瓜有南魚命女畜以俟相公願人勤報告無
不喜還辭到公前但有一聲唯

風雨靜夜爲響博評詩喜其間有發端之句曰爛爛青燈夜漸
涼旁搜遠紹緒茫茫而嗣聯不愜吾意思有以易之旣得六
句乃不復能爲其所有且轉而相貽卽以爲還詩之贈

爛爛青燈夜漸涼
旁搜遠紹緒茫茫
嬖奴莫問明朝米
詩婦來窺萬古藏
世上膏腴誰得失
眼中人代有興亡
淵哉若共楊雄老
再與侯芭醉萬場

吾有所不然於仲實欲作書而止者屢矣
比得其書乃知其用大人之一言翻然改慮
喜而和其春日見贈詩以道吾快且以吾之情
不鄉試告焉

正欲通辭託素波
其如對面九疑何
甯知一日天懷轉
始信三生福慧多
合配水仙遲薦菊
不羞山鬼老披蘿
錦衣貼月還多事
只許秋來散髮歌

仲實書中尤推美馬月樵阮仲勉以爲吾獨賴此兩君談道往還襟抱不俗耳惟當世亦夙欽此兩人而未之見乃疊韻一

首資仲實以求通

廢井無由更起波甯知江海浪如何城南尙有同心在世上原來醒
眼多皓月千秋公竹素高雲十丈倚松蘿如今馬阮成芳姓絕歎滄
浪孺子歌

送詩扇與謇博答兩事戲代東

舍弟莫知在楚吳飛書馳檄嗟無途四書擬題君自圖弗至丈我平
都都扇有兩面剛畢塗字卽瓦礫詩璣珠資我短僮一百蚨後夜三
更利走驅